

PKR.nr.287/14

NË EMËR TË POPULLIT

GJYKATA THEMELORE NË PRISHTINË/DEPARTAMENTI I KRIMEVE TË RËNDA, në përbërje nga kryetari i trupit gjykues - gjyqtari Naser Foniqi, me sekretaren juridike Sevdije Breznica, si procesmbajtëse, në çështjen penale të akuzuarit A.Z., për shkak të veprës penale Mbajtja në pronësi, kontroll ose posedim të pa autorizuar të armëve, nga neni 374, par. 1, të KPRK, i akuzuar sipas aktakuzës së Prokurorisë Themelore në Prishtinë/Departamenti i Krimeve të Rënda PP.I.nr.1061/2013, të datës 21.05.2014, pas shqyrtimit fillestar, të hapur për publikun, të mbajtur më datë 29.12.2017, në të cilin ishin të pranishëm: Prokurori i shtetit Merrushe Llugiqi dhe i akuzuari A.B., të njëjtën ditë, me datë 21.11.2018, mori dhe publikisht, shpalli këtë:

A K T G J Y K I M

I akuzuari A.Z., i biri i S.1 dhe Sh., e vajzërisë S.2, i lindur me datë ..., në fshatin O., Komuna P., tani me banim në F.K., fshati B., rruga "N.S.", pa numër, me numër personal ..., ka të kryer shkollën fillore, i pa martuar, i pa punë, i gjendjes së dobët ekonomike, shqiptar – shtetas i Republikës së Kosovës.

Ë S H T Ë F A J T O R

S e p s e: me datë 05.09.2013, rreth orës 19:55, në F.K., në rr. "H.H.", gjatë një kontrolli rutinë në vend publik, te i akuzuari policia ka gjetur një thikë të mbretë me dorezë ngjyrë kafe të cilën i akuzuari e ka mbajtur në pronësi dhe kontroll në kundërshtim me ligjin e zbatueshëm lidhur me armën, dhe e njëjta thikë është sekuestruar nga policia,-

- me këtë, ka kryer veprën penale Mbajtja në pronësi, kontroll ose posedim të pa autorizuar të armëve, nga neni 374, par. 1, të KPRK.

Prandaj, gjykata në bazë të neneve: 41; 46; 73 dhe 374, par. 1 dhe 3, të KPRK, si dhe nenit 365, të KPPK, të akuzuarit i shqipton:

DËNIM ME GJOBË

- **Në shumë prej treqind (300) €**, të cilin dënim, i akuzuari A.Z., obligohet ta paguaj brenda afatit prej 15 ditësh por jo më gjatë se tre muaj, pas plotfuqishmërisë së këtij aktgjykimi.
- Nëse dënimi i shqiptuar në të holla nuk mund të ekzekutohet, gjykata do t'i caktoj të akuzuarit një ditë burgimi për 20 € të gjobës.
- Obligohet i akuzuari që t'i paguaj të gjitha shpenzimet e procedurës penale, në emër të **paushallit gjyqësor të paguaj shumë prej 50 €, dhe pesëdhjetë (50.00) €, për Fondin për Kompensimin e Viktimave të Krimit**, në afat prej 15 ditësh, por jo më gjatë se tre muaj, pasi ky aktgjykim të marr formën e prerë.
- Të akuzuarit i konfiskohet thika e sekuestruar nga policia, e paraqitur si në dispozitiv të këtij aktgjykimi dhe e cila është si rezultat i kryerjes së veprës penale.

ARSYETIMI

Prokuroria Themelore në Prishtinë/Departamenti i Krimeve të Rënda, me aktakuzën PP.I.nr.1061/2013, të datës 21.05.2014, e ka akuzuar të pandehurin A.Z., për shkak të veprës penale Mbajtja në pronësi, kontroll ose posedim të pa autorizuar të armëve, nga neni 374, par. 1, të KPRK.

Në seancën e shqyrtimit fillestar, të datës 21.11.2018, pas leximit të aktakuzës nga prokurori i shtetit, i akuzuari A.Z., ka deklaruar se e ka kuptuar aktakuzën dhe e ka pranuar fajësinë për veprën penale për të cilën është akuzuar, si dhe ka shtuar se këtë thikë nuk e ka mbajtur me qëllim që ta lëndoi dikë, por atëherë ka qenë i ri dhe e ka mbajtur për qejf. Po ashtu, i akuzuari ka kërkuar nga gjykata që të ketë parasysh gjendjen e tij ekonomike pasi që ai punon herë pas here në Gj. dhe atje ka shkuar për ta ndihmuar familjen e tij, duke e lutur gjykatën që nëse e shpallë fajtor atij t'ia shqiptoi një dënim më të butë.

Sa i përket pranimit të fajësisë nga i akuzuari, Prokurori i Shtetit, ka deklaruar, se pranimi i fajësisë nga ana e të akuzuarit është bërë konform dispozitave të KPPK, me vullnetin e tij, i akuzuari i ka kuptuar pasojat dhe në përputhshmëri të plotë me provat të cilat gjenden në shkresat e lëndës, duke i propozuar gjykatës që arma e sekuestruar të konfiskohet, i akuzuari të shpallet fajtor dhe të dënohet sipas ligjit, si dhe si rrethanë lehtësuese të merret pranimi i fajësisë.

Pas deklarimit të të pandehurit se ndihet fajtorë për kryerjen e veprës penale për të cilën është akuzuar nga Prokuroria, kryetari i trupit gjykues me aktvendim ka pranuar pranimin e fajësisë nga i akuzuari, pasi është bindur se ai e ka kuptuar natyrën dhe pasojat e pranimit të fajit, po ashtu ky pranim është bërë vullnetarisht dhe është mbështetur në faktet e çështjes që përmban aktakuza.

Po ashtu, edhe nga shkresat e lëndës, gjykata gjeti se në veprimet e të akuzuarit ekzistojnë të gjitha elementet e veprës penale për të cilën është akuzuar, si dhe vërtetoi gjendjen faktike, të përshkruar si në dispozitiv të këtij aktgjykimi, prandaj gjykata edhe e shpalli fajtorë të akuzuarin, pasi që më parë gjeti se është penalisht përgjegjës.

Me rastin e përcaktimit të llojit dhe lartësisë së dënimit, gjykata mori parasysh të gjitha rrethanat që ndikojnë në llojin dhe lartësinë e dënimit, kështu që ndaj të akuzuarit gjykata mori në konsideratë rrethanat lehtësuese si në vijim: pranimin e fajit; sinqeritetin e treguar gjatë shqyrtimit fillestar dhe sjelljen e të akuzuarit para dhe pas kryerjes së veprës penale, duke pasur parasysh se sipas të dhënave të kësaj gjykate ndaj këtij të akuzuarit nuk ka të ngritur ndonjë aktakuzë tjetër dhe nuk është i dënuar më parë; ndërsa gjykata nuk gjeti ndonjë rrethanë veçanërisht rënduese, prandaj të akuzuarit i shqiptoi dënim si në dispozitiv të këtij aktgjykimi, me bindje se dënimi i shqiptuar, i përgjigjet shkallës së rrezikshmërisë shoqërore të veprës penale për të cilën edhe është shpallur fajtorë, si dhe shkallës së përgjegjësisë penale të të akuzuarit dhe se me dënimin e shqiptuar kundër tij, do të arrihet qëllimi i dënimit i paraparë me nenin 41, të KPRK, përkatësisht të parandaloi kryesit nga kryerja e veprave penale në të ardhmen, të bëjë rehabilitimin e tyre, të parandaloi persona të tjerë nga kryerja e veprave penale, të bëjë kompensimin e viktimave ose komunitetit për humbjet ose dëmet e shkaktuara nga veprat penale dhe të shprehë gjykimin shoqëror për veprën penale, për ngritjen e moralit dhe forcimin e detyrimit për respektimin e ligjit.

Vendimi që të pandehurit t'i merret sendi i përdorur për kryerjen e veprës penale, u mor në bazë të nenit 374, par. 3, të KPK.

Vendimi mbi shpenzimet e procedurës penale dhe paushallit gjyqësor, u mor në bazë të nenit 453, par. 1, të KPPK, **kurse vendimi mbi taksën për kompensimin e viktimave të krimit u mor në bazë të neneve: 3; 6 dhe 39, par .3.2 të Ligjit nr. 05/L-036 për Kompensimin e Viktimave të Krimit.**

Nga sa u tha më lart, dhe në bazë të nenit 365, të KPPK, u vendos si në dispozitiv të këtij aktgjykimi.

Ky aktgjykim është përpiluar me datë 21.11.2018.

GJYKATA THEMELORE NË PRISHTINË/DEPARTAMENTI I KRIMEVE TË RËNDA
PKR.nr.287/14, datë 21.11.2018.

Sekretare juridike,
Sevdije Breznica

Kryetari i trupit gjykues - gjyqtari,
Naser Foniqi

UDHËZIMI JURIDIK:

Kundër këtij aktgjykimi, ankesë mund të paraqesin personat e autorizuar brenda pesëmbëdhjetë (15) ditësh, nga dita e dorëzimit të kopjes së aktgjykimit. Ankesa bëhet përmes kësaj Gjykate, për Gjykatën e Apelit në Prishtinë.